



# Naalakkersuisooqatigiinnissamut isumaqatigiissut 2018

Nunarput  
- ineriartorfiusoq  
- tamanut inissaqartitsisoq

Oktober 2018

# TUNNGAVIUSUMIK ISUMAQATIGIISSUT

Siumut, Atassut aamma Nunatta Qitornai qinigaaffimmi 2018-miit 2022-imut Naalackersuinikkut suleqatigiissallutik isumaqatigiissuteqarput.

Suleqatigiinnermi pingaartillugu isumaqatigiissutaavoq nunarput inuilu pillugit pitsaasumik, tatingartumik, tutsuiginartumik innuttaasullu qitiutillugit Inatsisartuni Naalackersuisunilu sullissinisaq.

Inuiaqatigiit ineriartornerat nunarsuarmioqatigiinnermilu nukittuumik inissisimanerat annerulerseqqullugit partiit pineqartut naalackersuinikkut siunnerfeqaqatigiillutik sulissapput – Inatsisartuniinnaangitsoq Naalackersuisuniinnaangitsoq, aammali inuiaqatigiinni tamani suleqatigiinnerup siuarsaavigineqarnissaa ilanngullugu sulissutigineqassaaq.

Partiit akunnerminni isumaqatigiissutigivaat iluarsartuusseqqinnertigut sulissutigineqassasoq innuttaasut atugarisaasa pitsanngorsarnissaat aammalu minnerunngitsumik aningaasarsiornikkut siuariartortitsisoqarnissaa, taamaaliornikkut suliffissat nutaat pilersinneqarsinnaassammata sulisinnaasullu amerlanerusut sulilersinneqarlutik.

Naalackersuisooqatigiit tatigeqatigiillutik ataqpeqatigiillutillu suleqatigiilluarnissartik isumaqatigiissutigivaat. Nunatta sutigut tamatigut toqqissisimanartumik ineriartortinneqarluni siuariartornissaa ataatsimoorfiusumik suliarineqassaaq.

Inuiaqatigiit pisortallu suliassaraat pitsaasunik sinaakkusersuinissaq atugassaqartitsinissarlu, inuit ataasiakkaat sulliviillu ataasiakkaat ineriartorfissaannik.

Naalackersuisooqatigiit suliniarput pilersikkumallugit Nunatsinni inuiaqatigiit naligiissitaaffiusut, apequtaatinnagit sumi inunnorsimaneq, arnaaneq angutaanerluunniit kiisalu sumilluunniit upperisaqarneq. Inuit namminneq inuunerminnut akisussaasariaqarput aamma inunnut ataatsimoortunullu akisussaaqataasariaqarput. Inuiaqatigiit pitsaasut pilersinneqassappata pisariaqarpoq inuit ataasiakkaat akisussaaffimmik tigusinissaat suleqataallutillu. Inuit ataasiakkaat inuttut akisussaaffiunik arsaartussanngilagut tassa imaappoq nammineersinnaassusiiarneqassanngillat.

Naalackersuisooqatigiit nassuerutigaat suliffissaaleqineq inuiaqatigiinni ajornartorsiutit qaangerniagassat annerpaat ilagigaat, aammalu Namminersorlutik Oqartussat, kommunit aammalu suliffeqarnermi susassaqtut suliassaqarfiit akimorlugit najukkani, nunap immikkoortuini nunalu tamakerlugu assigiinngisitaartunik iliuuseqassallutik. Sulilersitsiniarnerluni periusissaq nutaaq suliarineqassaaq, tassanilu inuit amerlanerpaat sulilersinneqarnissaat siunertaavoq. Naalackersuisooqatigiinniit suliffissaaleqinerup 2022-mi 5 %-imut appartinneqassasoq anguniarneqarpoq.

Nunatta oqaluttuarisaanerani maannamut suliniutit annersaat nutaanik mittarfinnik pilersitsinissaq naammassiniarlugu naalackersuisooqatigiit sulissapput, aammalu erngup nukissiorfissat nutaat sanaartorneqarnissaat anguniarlugu sulissallutik. Mittarfissuarnik sanaartornissaq angallannikkullu aqqissuusseqqinnissaq Naalackersuisooqatigiit partiivisa pingaartimmassuk Naalackersuisooqatigiit partiillu tapersersuisup Inatsisartuni ilaasortaataaasa immikkut atsioqatigiissutaat ilanngussami takuneqarsinnaavoq.

## **Naalakkersuisooqatigiit suliassat makku ilanngullugit suliariniarpaat:**

- Atuartitaanikkut ilinniartitaanikkullu aaqqissuusseqqinneq ingerlanneqassaaq
- Piorsarsimassutsikkut nukittorsaaneq ingerlateqqinneqassaaq
- Inunnik isumaginninnikut sullissineq pitsanngorsarneqassaaq
- Innarluutillit pillugit inatsisissaq naammassineqassaaq
- Peqqinnissakkut sullissineq pitsanngorsarneqassaaq
- Ineqarnikkut aaqqissuusseqqinneq suliarineqassaaq
- Aalisarneq pillugu inatsit naammassillugu suliarineqassaaq
- Aallaaniarneq piniarnerlu pillugit inatsit nutarterneqassaaq
- Illoqarfinni nunaqarfinnilu tunisassiorfeqarneq piorsaqqinneqassaaq
- Inuussutissalerineq pillugu inatsit nunatsinnut naleqqussarneqassaaq
- Inuiaqatigiinnut akuulersitsineq pillugu inatsiseqalissaagut
- Sulisoqarneq pillugu inatsisitigut aaqqissuusseqqinnissaq
- Niuerneq niueqatigiinnerlu pillugit inatsisitigut naleqqussaanissaq
- Akileraarutit, akitsuutit, iluanaarusiisarnerlu pillugit inatsisitigut naleqqussaanissaq
- Qinersisarneq pillugu inatsit naleqqussarneqassaaq
- Akisussaaffiit naalagaaffimmiit tigusassavut pillugit tulleriarissaagut
- Tunngaviumik inatsisissaq pillugu suliat ingerlateqqissavagut.
- Avatangiisit pillugit aningaasaateqarfik pilersinneqassaaq

Nunatsinni innuttaasut atugarisaasa pitsanngorsarnissaat pingaarnerpaatillugu ingerlatsisoqassaaq. Meeqqat, ilaqutariit meerartallit, utoqqaat, innarluutillit, napparsimasut siusinaartumillu pensionisallit ilinniartullu atugarisaat pitsaanerulersinniarlugit aaqqissuusseqqinnerit suliarineqassapput.

Suliffeqarnermi ilanngaat 2020-imiit aallartittumik eqqunneqassaaq isertitakinnernut akunnattumillu isertitaqartartunut annertusiartuaartumik iluaqusiisumik.

Naalakkersuisooqatigiit pisortat ingerlatsiviini tamani allaffissornikkut ingerlatsinerup annikillisarneqarsinnaanera misissussavaat. Ilangullugu inuiaqatigiinni qaammarsaanerup ingerlaqqinnissaa suliarineqassaaq.

Inatsisartuni aalajangiunneqareersup Tunngaviumik Inatsisiliornissamut isumaliutissiissusior-toqarnissaa Naalakkersuisooqatigiit ingerlateqqinniarlugu isumaqatigiissutigaa.

Ingerlatseqatigiiffisuit pisortanit pigineqartut sorliit, qanoq sukkullu namminersortunngorsarneqarsinnaanerat Naalakkersuisooqatigiit nalilersorniarpaat.

Nunatta kimmuk nunamut sanilitsinnut angallannikkut assartuinikkullu attaveqalernissaa Isumaqatigiissuteqartut sulissutigissavaat.

Kiffartuussinissamik isumaqatigiissuteqarnermi pitsaassutsip minnerpaaffissaa qulakkeerneqartassaaq, apeqqutaatinnagu silaannakkut imaatigullu angallassinerneruq. Kommunit kommuneqarfimmini inunnik angallassinikkut nammineq oqartussaalernissaat Isumaqatigiissuteqartut sulissutiginiarpaat.

Assartuinikkut ingerlatseqatigiiffiit kisermaassisussaataitanerat nalilersoqqissaarneqassaaq, tunisassiorfiit toqqorsiveqarnikkut ulikkaartoorminni assartuigasuartarsinnaanerat eqqarsaatigalugu. Nioqqutissanilli assartuinerit il.il. isumannaatsuujarnissaat qulakkeersimajuarneqassaaq.

Silaannakkut angallannermi nakkutilliisoqarfiup silasiornikkullu upalungaarsimanermit nakkutillii-nerup nunatsinnit akisussaaffigineqalernissaa Isumaqatigissuteqartut anguniarpaat. Uani misissoq-qissaarneqassapput aningaasaqarnikkut sunniutissat aammalu suliaasaqarfiup tigunissaanut pisin-naasat pisariaqartut maannakkut naammattut piginerivut.

Isumaqatigiissuteqartut periarfissaatillugu pingaartippaat inoqarfiit akornanni ilaatigut inuussutis-sarsiornermi inerisaanissaq siunertaralugu aqqusinniorsinnaanerup aqutissiuunnissaa. Taamattumik Isumaqatigiissuteqartut anguniarpaat nunatsinni aqqusernit pillugit inoqarfiillu akornanni aqqusinniornissat pillugit ingerlatsivimmik pisortaqaqfeqalernissaa.

Kangerlussuup Narsarsuullu siunissaat pillugit kommunit peqatigalugit aalajangiisoqassaaq, tas-sungalu atatillugu namminersorlutik inuussutissarsiuteqartut suliaassanik tiguisinnaanerit ammaffi-gineqassalluni.

## **ANINGAASAQARNEQ**

Nunatta pisuussutai sugaluartulluunniit inuiaqatigiit pigaavut. Pisuussutitta iluaqutigineqarnerat tunngaviussaaq aningaasarsiornikkut ineriartornitsinnut. Nunatsinni inuussutissarsiutit isuman-naatsut arlariissillugit ineriartortissavagut.

Nunatsinni aningaasarsiornikkut ingerlatsinermi anguniarneqassaaq nunatta aningaasatigut kiffaan-ngissuseqalernissaa. Tamanna anguniarneqassaaq nunap iluani avammullu tunisassiornerup pimoo-rullugu ineriartortittuarneratigut. Aningaasarsiornikkut ingerlatsinermi innuttaasut inuuniarnikkut atugarsaasa isumannaatsuunissaat pitsanngorsartuarnissaallu anguniassavarput.

Nunatsinni tunisassiorneq inuussutissarsiorerlu nunat tamalaat akornanni unammillersinnaasaria-qarpoq aammalu sapinngisaq naapertorlugu aningaasartuutitigut unammillersinnaasunik atugassaqa-rtitsisariaqarluni.

Nunatta immikkoortui tamarmik aningaasarsiornikkut ineriartornissamut periarfissaqartittariaqar-pavut, nalilinnik pilersitsiviusut salliutillugit aammalu kommunit aningaasarsiornikkut ineriartor-titsinissamut periarfissaat annertusarlugit.

Kalaallit Nunaata Danmarkillu akornanni aningaasat ingerlaarnerat pillugu nassuiaammik suliaqarto-qassaaq Inatsisartunut saqqummiunneqartussamik.

Nalilinnik nalikinaaraluni annissuinnginnissamik (transferpricing) inatsisiliortoqassaaq.

## **AKILERAARUTIT AKITSUUTILLU**

Suliffeqarfinnut namminersortunut akileraarut appartinneqassaaq nunatsinni suliffinnik pilersitsi-nissap orniginartuunissaa eqqarsaatigalugu, nunattalu nunanut sanilerisatsinnut suleqatigisatsinnullu unammillersinnaassuseqartuarnissaa anguniarlugu. Ilanngullugu nalikilliisarnermut atugassariti-taasut naleqqussarneqassapput.

Suliffeqarnermi ilanngaat 2020-imiit aallartittumik eqqunneqassaaq isertitakinnernut akunnattumillu isertitaqartartunut annertusiartuaartumik iluaqusiisumik.

Illuutinut Inissiaatinullu iluarsaassinernut aningaasartuutit akileraarutitigut ilanngaatigineqartar-sinnaanerit misissorneqassaaq.

Peqatigiiffinni nammineq kajumissutsimik sulinermi ilanngaammik eqqussisoqarnissaanut periarfissat misissorneqassapput, tassanilu timersornermut, kulturimut, isumaginninnermut pinaveersaartitsinermullu siunertaqartuni peqatigiiffinni sulineq akileraartarnikkut iluaquserneqartassaaq.

## **SULIFFEQARNEQ**

Inuusuttut inuussutissarsiutitigut ilinniagaqartut sapinngisamik amerlanerpaat sulilersinnissaat qulakkeerneqassappat suliffeqarfiit praktikkertunik sungiusartunillu amerlanerusunik tiguisalernissaat anguneqartariaqarpoq. Tamanna anguneqassappat suliffeqarfiit praktikkertunik sungiusartunillu tiguisarnerat pillugu inatsisitigut sinaakkuṭit aaqqinneqartariaqarput.

## **ILINNIARTITAANEQ**

Nunarsuarmi tamarmi sukkatsikkaluttuinnartumik ineriartorfiusumi nunatsinni innuttaasut ilinni-arluarsimallutillu qaammaasaqarluartuunissaat naalakkersuisooqatigiit pingaartilluinnarpaat. Tassami naalakkersuinikkut, niuernikkut teknikkiknullu ineriartornermi, nunattalu nunanik allanik suleqateqarnerani ilinniarluarsimassuseq pingaaruteqaleraluttuinnartumik inissisimammat.

Nunatsinni ilinniarfeqarfiit nukittuut ataatsimoorfiusut pilersittarnerat ingerlateqqissavarput. Nunatsinni teknikkikkut Sisimiuni ilinniarfik nukittorsaqqinneqassaaq teknikkikkut ilinniartitaanerit ingerlaqqiffiusut ilinniarneqarsinnaasunngorlugit, soorlu maskinmesterit ilinniartitaasarneq aallartinneqassaaq.

Taamatullu inuusuttut tamarmik meeqqat atuarfianniit ingerlaqqittarnissaat qulakkeerniarlugu assassornikkut piginnaanillit teknikkikkut ilinniarnissamut periarfissinnissaat aqquṭtissiuunneqassaaq.

Kilisaatinik aalisarnikkut fabrikkinilu aalisakkerinikkullu maskinat ilinniartitsissutigineqartarnissaat aqquṭtissiuunneqassaaq.

Sisimiuni teknikkikkut ilinniarfiup piorsaavigineqarnissaa ukiunut arlalinnut ingerlasussanngorlugu pilersaaruserneqassaaq.

## **ATUARFITSIALAK ILINNIARTITAANERLU ATAQATIGIISOOQ**

Ullumikkut Atuarfitsialammi naammassisartut ikippallaarujussuarput malitsigisaanillu atuarfimiik naammassillutik ilinniarfinnut ingerlaqqittartut aamma ikippallaarujussuarlutik. Taassuma takutippaa immikkut iliuuseqarnissaaq avaqqunneqarsinnaanngitsooq.

Naalakkersuisooqatigiit anguniarpaat, Atuarfitsialak ilinniartitaanerlu ataqatigiisooq pilersissallugu. Siunissami atuartut sapinngisamik tamarmik ingerlaqqittalernissaat anguniarlugu campusit aqquṭtigalugit GUX'ertalissapput inuussutissarsiutinullu ilinniarfinnut qinnuteqaqqaaratik ingerlaqqittalissallutik. Aaqquṭtissuseqqinnerup malitsigissavaa, atuartut tamarmik siunnersorneqarluarsimallutik nukittuffimminnillu tapersorneqarluarsimallutik naammassisalissasut ilinniagaqarlutik suliffinni allagartaqarlutik atorsinnaasaminnik.

## **ILAQUTARIIT**

Ilaqutariit inuiaqatigiinni qitiupput. Ilaqutariit pillugit politikissamik nutaamik pilersitsisoqassaaq. Tamatumani aamma nunani sanilerisatsinni misilittakkat iluatsilluartumik kinguneqarsimasut isumassarsiorfigineqassapput.

Ilaqutariit siunnersorneqarnissamik pisariaqartitsisut piaartumik ikiorneqartarnissaat naalackersuisooqatigiit aqutissiuutissavaat, taamaasiornikkut meeqqanik angerlarsimaffiup avataanut inissii-sarnej aamma annikillisarnejarsinnaaqqullugu. Ilaqutariit siunnersorneqartarnerat pitsaanerusunngorlugu ingerlaqittariaqarpoq, tamatumunnga naammattunik ukiut tamaasa aningaasaliisoqartarnissaa qulakkeersimajuartariaqarpoq.

## **UTOQQAAT**

Utoqqaat tunngaviusumik utoqqalinersiutiminnik ilanngaaffigineqaratik sulinerikkut isertitaqarsinnaaneratt aqqiivigineqassaaq, 2020-imiit aallartittumik. Utoqqaat tamarmik naligiimmik tunngaviusumik utoqqalinersiuteqalersillugit, saniatigut suliffeqarnej, katissimaneq, aappariinneq najugaqatigiinnerluunniit apeqputaatinnagit.

Utoqqaat Illersuisuannik pilersitsinissaaq sulissutigineqassaaq.

## **AALISARNEQ PINIARNERLU**

Aalisarnikkut inuussutissarsiornej nunatta nappatigaa, taamaattumillu ineriartortittuarnissaa naleqqussartuarnissaalu pisariaqarluni. Taamaattumik aalisarnej pillugu inatsisissap, sivisuumik attanarjarsinnaasup, Naalackersuisooqatigiit susassaartullu nunatsinni naapeqatigiissutigineqarsinnaasumik suliaqassapput, inuiaqatigiinni annertunerpaamik iluaqusiisumik. Tamatumani ilanngullugu inuusuttut aalisartut periarfissaat pitsaanerulersinniarlugit sinaakkusersorneqassapput.

Nunatsinni aalisagartassat pisassiissutigineqartartut tamakkerlugit qaqinneqartarnissaat naalackersuisooqatigiit anguniarpaat, taamatullu aalisakkat tamakkiisumik atorluarneqarnissaat qulakkernejartassalluni aamma allaffissornikkut sullissinermi pisariaqannigitsumik aporfiulersartut aqqiivigineqarnissaat Naalackersuisooqatigiit sulissutigissavaat.

Nunatta sineriaa tamarmi aalisarnikkut aqutsiveqarfinnut immikkoortiternejassaaq, tassanilu sapinngisamik aalisakkat amerlanerpaat pillugit pisassiisoqartassalluni. Uumassusilinnik siunnersuisartut pisassat annertussusaannik innersuussuteqartassapput, tassanilu aqutsiviit nutaat ilanngullugit siunnersuisoqartassaaq.

Nunatta Islandillu akornanni imartatsinni pisassiissutigineqartartut nutaamik aalajangiiffigineqarnissaat Naalackersuisooqatigiit siunniuppaat – pisassiissutini tamani naligiinnerusumik inissikiartuaarnissaat angujumallugu. Ilisimatuussutsikkut misissuinerit annertusineqassapput tamatumani aalisartitseqatigiiffiit pisassinneqartut tamarmik aamma pisussaaffilersorneqartallissapput.

Aalisakkanik ikerinnaasiortunik pisassiisarnermi pisassiissutit amerlanerpaat aalisariutinut nunatsinnersunut pisassiissutigineqartassapput, aalisagartassiissutigineqartunut naleqquttumik aalisariutitigut inerisaasoqarnissaa aamma aqutissiuunneqassaaq. Pisarineqartartut sapinngisamik naleqarnerpaatillugit avammut tunisassiarineqartarnissaat qularnaarneqartassaaq.

Aqumiut kalaallit aalisariutini kilisaatinilu amerlanerulernissaat anguniarlugu naalackersuisooqatigiit aalisarnermik inuussutissarsiuuteqartunut isumaqatigiissusiornissaaq sulissutigissavaat, aqumiut nunaqavissut aqqiissuussaasumik ilinniartinneqartarnissaat piviusunngortinniarlugu.

Aalisarnermik piniarnermillu inuussutissarsiutigalugu allagartaqartarneq naalakkersuisooqatigiit nutarterniarpaat.

Aalisarnermut siunnersuisarfiup sinerissami immikkoortortaqaqfeqalernissaa aamma Pinngortitaleriffiup Avannaani immikkoortortaqaqfeqalernissaat naalakkersuisooqatigiit sulissutiginiarpaat.

Piniakkanik atuineq piujuaannartitsineramik tunngaveqarluni ingerlanneqassaaq, kinguaariit piniagassaqartuarnissaat qulakkeerniarlugu siunissamilu piniartutut inuuniuteqarnerup ingerlaqqissinnaanera tassuunakkutaaq qularnaarniarlugu. Tamannalu anguniarneqassaaq pisuussutit uumassusillit nerisareqatigiiaat aallaavigalugit illersuinikkut.

Kalaaliminernik tunisassiornerup ineriartortittuarnissaa naalakkersuisooqatigiit sulissutiguassavaat, nunatsinni immitsinnut inuussutissatigut pilersornerunissarput piviusunngortitsiviusumik ingerlanneqarnissaa. Taamaammat naalakkersuisooqatigiit pingaartippaat kalaaliminernik tunisassiornerup ineriartortittuarnissaa.

## **AALISAKKAT SULIAREQQINNERI**

Naalakkersuisooqatigiit siuttuuffigissavaat aalisakkat, qaleruallit, suaat il.il. amerlanerit inereerlugit nunatsinni tunisassiarineqartarnissaat.

Taamaattumik Aalisakkerineramik Ilinniarfissap piviusunngortinnissaa naalakkersuisooqatigiit naammassillugu suliariniarpaat, piaartumik aallartinnissaa siunertarlugu.

*Aalisakkanik tunisassiornermi tunisassianik inerisaavissap aammalu tunisassiat inereerlugit suliarinnittarfissap Paamiuni Suliffissuaq atorluarlugu Naalakkersuisooqatigiit tunisassiorlut peqatigalugit pilersinnissaa sulissutiginiarpaat.*

## **IMMINUT PILERSORNEQ**

Naalakkersuisooqatigiit anguniarpaat nunatsinni annertunerusumik sutigut tamatigut (nukissiuuteqarnikkut, nerisaqarnikkut, imeqarnikkut, uumasuuteqarnikkut, naatitanik pilersorsinnaanikkut il.il.) imminut pilersorsinnaanerup annertusartuarnissaa.

## **AATSITASSARSIORNEQ UULIASIORNERLU**

Nunatta pisuussutaanut tamanut oqartussaanerput kiisalu pisuussutinut uumaatsunut tamanut oqartussaaneq namminersorneq pillugu inatsimmi aalajangersarneqarput.

Aatsitassarsiorneq uuliasiornerlu aallartinneqartussaattillugit aatsitassat pillugit inatsit malinneqartussaavoq, taamatullu saffiugassat qaqutigootut qinngornillit ilanngullugit piarneqartussaattillugit.

Aluminiumik aatsitsivimmik pilersitsinissamut periarfissat misissorneqarnissaat Naalakkersuisooqatigiit ammaffigivaat, tamanna nunatsinni avatangiisit pillugit piumasaqaatitsinnut eqquutsitsippat.

## **ANGERLARSIMAFFEQANNGINNEQ**

Partiit Naalakkersuisooqatigiit sulissutigissavaat innuttaasut inissamik innersuunneqartarnerat ilanngullugu inissiat pillugit iluarsartuussinermi kommunit peqatigalugit suliarineqassasoq.

## **QARASAASIAQARFISSUIT**

Nunarsuarmi sumiiffinni arlalinni qarasaasiaqarferujussuit eqiteruffiiniq peqarpoq. Taakku innaallagissamik annertoorujussuarmik pisariaqartitsipput. Innaallagissallu pilersinnissaa tamatigut avatangiisinut innarlitsaaliuisuuneq ajorpoq, taamaattumillu nunatsinni erngup nukinganik peqqumaa-teqarnitsigut periarfissavut atorluartariaqarpagut.

Nunarput qarasaasiaqarfissuit eqiteruffiannik ataatsimik arlalinnilluunniit inissiiffigissallugu maanna periarfissaqalereerpoq, tassami immap naqqatigut qarasaasiatigut attaveqaat Nunatta, USA-p Europallu akornanni pilersinneqareerpoq.

## **ATTAVEQAATIT**

Immakkut kabelersuup piginnaasaa tamakkersortinneqassaaq, aningaasaliissutit inuiaqatigiinnut iluaqutaqqullugit, taamaattumik kabelersuup Nunavummut Nunavimmullu ikaartinneqarsinnaanera misissorneqassaaq.

Kabelersuup piginnaasaata avammut tuniarsinnaanera ammaanneqassaaq.

## **TIMERSORNEQ**

Inuiaqatigiit timikkut anersaakkullu peqqissut pilersinneqassapput, innuttaasunut timersornikkut periarfissat annertusarneqarnerisigut. Peqqinnissaqarfimmu aningaasaliissutit misissorneqassapput aningaasaliissutit sullitanut siunertaqartunut atorneqalerniassammata aammalu allaffissornermut aningaasartuutikillisaasoqarluni.

Meeqqanik inuusuttunillu sungiusaasut aqutsisullu pitsaanerusunik atugassaqarnissaat Naalakkersuisooqatigiit aqutissiuutissavaat. Meeqqat inuusuttullu sunngiffimmini peqqinnartunik sammisaqarsinnaassapput timersorneruppat, kulturikkut sulineruppat, inuusuttunulluunniit sammisaqartitsineruppat, soorlu nipilersornerit assigisaallu. Sunngiffimmi ilinniartitsinerit nukittorsarneqassapput. Nunatta erfalasua atorlugu OL-mi nunarsuarmioqatillu unammuaarnerini allani peqataasoqarsinnaalernissaa naalakkersuisooqatigiit anguniarpaat.

Timersornernermut aningaasaliissutit naapertuunnerusunngorlugit qaffatsinneqassapput.

## **AVATANGIISEQ**

Naalakkersuisooqatigiit anguniarpaat sulissutiguassallugulu nunatta avatangiisittalu mingutsitsinernut suusunulluunniit illersorneqarnissaa, tamannalu anguniartuarneqassaaq ataani allassimasut tunngavigalugit:

Nunatsinni qitiusumik eqqakkanut ikuallaasarfissuaqalersinnaaneq misissorneqassaaq, ikuallaasarfissuaq nukimmik annertuumik pilersuisoqarsinnaasumiittussaammat.

Avatangiisit pillugit aningaasaateqarfik pilersinneqassaaq.

## **ILISIMATUSARNEQ**

Nunani tamalaani ilisimatusarnermi nunarput pingaarutilerujussuarmik inissisimavoq, taamaammat Naalakkersuisooqatigiit sulissutiginiarpaat nunatta nunarsuarmioqatigiinni annertusiartortumi ilisimatusarnikkut peqataanissaa.



Nunanit allaniik nunatsinnut ilisimatusariartortartut nunarsuatsinni pingaaruteqartumik iluaqutaapput nunatsinnullu aamma ilisimalikkat iluaqutaanissaat pingaaruteqartorujussuuvoq taamaattumik naalackersuisooqatigiit pingaartippaat, ilisimasani katersuivissap piaartumik naammassineqarnissaa aningaasallu ilisimatusarnermi pisariaqartinneqartut qulakkeerneqarnissaat.

Ilisimatusarnerup iluani nunatsinnut soqutiginnittut amerliartuinnarnerisa kinguneraat ilisimatusartunut inissat suli amerlanerusut pisariaqartinneqarnerat tamannalu naalackersuisooqatigiit suli annertusaaffigeqqinniarpaat, aammattaaq naalackersuisooqatigiit ilisimavaat Ilisimatusarfiup allilerneqarnissaa pisariaqartinneqartoq tamannalu anguniarlugu naalackersuisooqatigiit sulissapput.

## **SILAP PISSUSAATA ALLANNGORIARTORNERA**

Naalackersuisooqatigiit silaannaap pissusaata allanngoriartornerata Nunatsinni inuunermut assigiinngitsorpassuartigut sunniuteqariartuinnarnera eqqumaffigilluinnarpaat. Avaqqunneqarsinnaanngitsumik kultuurikkut, inuussutissarsiornikkut, sanaartornikkut angallannikkullu pissutsit sukkaasuumik allanngoriartorput. Aatsaat taama pilersaarusiorluakkamik ingerlatsinissaq sutigut tamatigut pingaartigilerpoq.

Naalackersuisooqatigiit Isumaqaatigiissutaat atuutilerpoq ulloq \_\_\_\_ . oktober 2018.

Siverth K. Heilmann  
Atassut

Kim Kielsen  
Siumut

Vittus Qujaukitsoq  
Nunatta Qitornai